

有法悟无法 心随法生法随心滅
无脩解有脩 性本无脩脩即非性
包含萬象體 心空性寂无所不容
不掛一絲頭 纔染一塵即成滲漏
右頌言其體用也體之則無用之則有所以自有
法頓悟无法因无脩勘破有脩至於有无不立心
法雙忘體同太虛包羅无外大道之理至是而盡
矣

大道至註終

太上昇玄說消灾護命妙經註

脩 江 然 子 註

太者無也上者極 昇高也玄妙也說開化也消
滅也灾害也護保也命身也妙方之又玄也經心
也徑也人人共行之徑路也天尊言無極大道化
生天地萬物之多無物不有其妙唯人得其秀而
最靈然雖靈也人生風土不同稟受則有殊異是
有賢愚不平等故天尊以慈憫力開方便門普化世
人明本來之真性全見有之身命以心鍊念以情
歸性然默運天機流精化氣會於乾官充周四體
乃謂之昇玄運符火以鍊神晝金液以鍊形形強
神清諸邪不入百病不生長生久視超塵出劫乃